

四庫全書

集部

欽定四庫全書

集部

御定全唐詩卷七百五十五至
七

詳校官庶吉士臣胡鈺

主事銜臣徐以坤覆勘

總校官知縣臣繆琪

校對官中書臣金光悌

謄錄監生臣黃廷璧

欽定四庫全書

御定全唐詩卷七百五十五

徐鉉

送陳先生之洪井寄蕭少卿

聞君仙袂指洪厓我憶情人別路賒
知有歡娛游楚澤更無書札到京華
雲間驛閣連江靜春滿西山倚漢斜
此處相逢應見問為言搔首望龍沙

送龔明府九江歸寧

茂宰隲官去扁舟著綵衣
溫城春酒熟匡阜野花稀
解纜垂楊綠開帆宿鷺飛
一朝吾道泰還逐落潮歸

和江西蕭少卿見寄二首

亡羊岐路媿司南二紀窮通聚散三
老去何妨從笑傲
病來看欲嬾朝參離腸似線常憂斷
世態如湯不可探
珍重加餐省思慮時時斟酒壓山嵐

身遙上國三千里名在朝中二十春
金印不須辭入幕
麻衣曾此歎迷津卷舒由我真齊物
憂喜忘心即養神

世路風波自翻覆虛舟無計得沉淪

送薛少卿赴青陽

我愛陶靖節更隱從絃歌我愛費徵君高卧歸九華清
風激頽波來者無以加我志兩不遂漂淪浩無涯數奇
時且亂此圖今愈賒賢哉薛夫子高舉凌晨霞安民即
是道投足皆為家功名與權位悠悠何用誇攜朋出遠
郊酌酒藉平沙雲收遠天靜江濶片帆斜離懷與企羨
南望長咨嗟

送高起居之涇縣

右史罷朝歸之官句水湄別我行千里送君傾一卮酒
罷長歎息此歎君應悲亂中吾道薄卿族舊人稀胡為
佩銅墨去此白玉墀吏事豈所堪民病何可醫藏用清
其心此外慎勿為縣郭有佳境千峰谿水西雲樹杳迴
合巖巒互蔽虧彈琴坐其中世事吾不知時時寄書札
以慰長相思

宿茅山寄舍弟

茅許稟靈氣一家同上賓
山空有廟舉世更無人獨
往誠違俗浮名亦累真
當年各自勉雲洞鎮長春

晚憇白鶴廟寄句容張少府

日入林初靜山空暑更寒
泉鳴細巖竇鶴唳眇雲端
拂榻安碁局焚香戴道冠
望君殊不見終夕凭欄干

題紫陽觀

南朝名士富仙才
追步東卿遂不迴
丹井自深桐暗老
祠宮長在鶴頻來
巖邊桂樹攀仍倚
洞口桃花落復開

惆悵霓裳太平事一函真跡鎖昭臺

贈奚道士

舍象

先生曾有洞天期猶傍天壇摘紫芝處世自能心混沌
全真誰見德支離玉霄塵閉人長在金鼎功成俗未知
他日飈輪謁茅許願同雞犬去相隨

題碧巖亭贈孫尊師

絕境何人識高亭萬象含凭軒臨樹杪送目極天南積
靄生泉洞歸雲鎖石龕丹霞披翠巘白鳥帶晴嵐仙去

留虛室龍歸漲碧潭幽巖君獨愛玄味我曾耽世上愁
何限人間事久諳終須脫羈鞅來此會空談

題白鶴廟

平生心事向玄關一入仙鄉似舊山白鶴唳空晴眇眇
丹砂流澗暮潺潺嘗嗟多病嫌中藥擬問真經乞小還
滿洞煙霞互陵亂何峰臺榭是蕭閑

步虛詞五首

氣為還元正心由抱一靈凝神歸罔象飛步入青冥整

服乘三素旋網躡九星瓊章開後學稽首奉真經

天帝黃金闕真人紫錦書霓裳紛蔽景羽服迴凌虛白
鶴能為使班麟解駕車靈符終願借轉共世情疎

聖主過幽谷虛皇在藥宮五千宗物母七字祕神童世
上金壺遠人間玉篇空唯餘養身法脩此與天通

何處求玄解人間有洞天勤行皆是道謫下尚為仙蔽
景乘朱鳳排虛駕紫煙不嫌園吏傲願在玉宸前

三素霏霏遠盟威凜凜寒火鈴空滅沒星斗曉闌干佩

響流虛殿爐煙在醺壇蕭寥不可極驂駕上雲端

留題仙觀

瑤壇醺罷晚雲開羽客分飛俗士迴為報移文不須勒
未曾游處待重來

和陳洗馬山莊新泉

已開山館待抽簪更要巖泉欲洗心常被松聲迷細韻
忽流花片落高岑便疏淺瀨穿莎徑始有清光映竹林
何日煎茶醞香酒沙邊同聽暝猿吟

奉和七夕應令

今宵星漢共晶光，應笑羅敷嫁侍郎。
斗柄易傾離恨促，河流不盡後期長。
靜聞天籟疑鳴佩，醉折荷花想艷粧。
誰見宣猷堂上宴，一篇清韻振金鐙。

又和八日

微雲疎雨淡新秋，曉夢依稀十二樓。
故作別離應有以，擬延更漏共無由。
那教人世長多恨，未必天仙不解愁。
博望苑中殘酒醒，香風佳氣獨遲留。

和印先輩及第後獻座主朱舍人郊居之作

成名郊外掩柴扉，樹影蟬聲共息機。
積雨暗封青蘚徑，好風輕透白練^{所於切}衣。
嘉魚始賦人爭誦，荆玉頻收國自

肥。獨坐公廳正煩暑，喜吟新詠見玄微。

印以南有嘉魚賦及第

和致仕張尚書新創道院

梓澤成新致，金丹有舊情。
挂冠朝睡足，隱几暮江清。
藥圃分輕綠，松窓起細聲。
養高寧厭病，默坐對諸生。

尚書時有瘡疾

和尉遲贊善秋暮僻居

登高節物最堪憐
小嶺疎林對檻前
輕吹斷時雲縹緲
夕陽明處水澄鮮
江城秋早催寒事
望苑朝稀足晏眠
庭有菊花尊有酒
若方陶令媿前賢

和陳贊善致仕還京口

海門山下一漁舟
中有高人未白頭
已駕安車歸故里
尚通閨籍在龍樓
泉聲漱玉窓前落
江色和煙檻外流
今日君臣厚終始
不須辛苦畫雙牛

京使迴自臨川得從兄書寄詩依韻和

珍重還京使殷勤話故人
別離長挂夢寵祿不關身趣
向今成道聲華舊絕塵
莫嗟客鬢老詩句逐時新

陪鄭王相公賦筵前垂冰應教依韻

窓外虛明雪乍晴
簷前垂霤盡成冰
長廊瓦疊行行密
晚院風高寸寸增
玉指乍拈簪尚媿
金階時墜磬難勝
晨餐堪醒曹參酒
自恨空腸病不能

送禮部潘尚書致仕還建安

名遂功成累復輕
鱸魚因起舊鄉情
履聲初下金華省

帆影看離石首城
化劍津頭尋故老
同亭會上問仙卿
冥鴻高舉真難事
相送何須淚滿纓

慢亭亦號同亭

和尉遲贊善病中見寄

仙郎移病暑天過
却似冥鴻避尉羅
晝夢乍驚風動竹
夜吟時覺露霑莎
情親稍喜貧居近
性嬾猶嫌上直多
望苑恩深期勿藥
青雲岐路未蹉跎

池州陳使君見示游齊山詩因寄

往歲曾游弄水亭
齊峰濃翠暮軒橫
猿出檻心雖喜

傷鳥聞弦勢易驚病後簪纓殊寡興老來泉石倍關情
今朝池口風波靜遙賀山前有頌聲

再領制誥和王明府見賀

蹇步還依列宿邊拱辰重認舊雲天自嗟多難飄零困
不似當年膽氣全難樹晚花疎向日龍池輕浪細含煙
從來不解為身計一葉悠悠任大川

送高舍人使嶺南

西掖官曹近南溟道路遙使星將渡漢仙槎乍乘潮柳

欽定四庫全書

御定全唐詩
卷七百五十五

映^{一作映}靈和折梅依大庾飄江帆風淅淅山館雨蕭蕭陸

賈真迂濶終童久寂寥送君何限意把酒一長謠

和王明府見寄

時情世難消吾道薄宦流年危此身莫歎京華同寂寞
曾經兵革共漂淪對山開戶唯求靜貴酒留賓不道貧
善政空多尚淹屈不知誰是解憂民

和方泰州見寄

逐客淒淒重入京舊愁新恨兩難勝雲收楚塞千山雪

風結秦淮一尺冰置醴筵空情豈盡投湘文就思如凝
更殘月落知孤坐遙望船窓一點星

文獻太子挽歌詞五首

國有承祧重人知秉哲尊清風來望苑遺烈在東藩此
日升緱嶺何因到寢門天高不可問煙靄共昏昏
夏啟吾君子周儲上帝賓音容一飄忽功業自紛綸露
泣承華月風驚麗正塵空餘商嶺客行淚^{一作哭}下宜春

出處成交讓經綸有大功淚碑瓜步北棠樹蒜山東百

欽定四庫全書

御定全唐詩
卷七百五十五

揆方時叙重離遂不融故臣偏感咽曾是歎三窮

甲觀光陰促園陵天地長簫笳咽無韻賓御哭相將盛

烈傳彝鼎遺文被樂章君臣知己分零淚亂無行

綵仗清晨出非同齒冑時愁煙鎖平甸朔吹繞寒枝楚

客來何補緱山去莫追迴瞻飛蓋處掩袂不勝悲

送王員外宰德安

家世朱門貴官資粉署優今為百里長應好五峰游柳
影連彭澤湖光接庾樓承明須再入官滿莫淹留

以端谿硯酬張員外水精珠兼和來篇

請以端谿潤酬君水玉明方圓雖異器功用信俱呈
自得山川秀能分日月精巾箱各珍重所貴在交情

奉使九華山中途遇青陽薛郎中

故人相別動相思此地相逢豈素期九子峰前閑未得
五谿橋上坐多時甘泉從幸余知忝宣室徵還子未遲
且飲一盃消別恨野花風起漸離披

奉命南使經彭澤

值王明府
不在留此

遠使程途未一分離心常要醉醺醺那堪彭澤門前立
黃菊蕭疎不見君

南都遇前嘉魚劉令言游閩嶺作此與之

我持使節經韶石君作閑游過武夷兩地山光成獨賞
隔年鄉思暗相知洪厓壇上長岑寂孺子亭前自別離
珍重分岐一盃酒強加餐飯數吟詩

閣旱山

殿影高低雲掩映松陰繚繞步徘徊從今莫厭簪裾累

不是乘輅不得來

玉笥山留題

仙鄉會應遠王事如何極征傳莫辭勞玉峰聊一息形骸已銷散心想都凝寂真氣自清虛非關好松石九仙皆積學洞壑多遺跡游子歸去來胡為但征役

廬陵別朱觀先輩

桂籍知名有幾人翻飛相續上青雲解憐才子寧唯我遠作卑官尚見君嶺外獨持嚴助節宮中誰薦長卿文

新詩試為重高詠朝漢臺前不可聞

文或少卿文山郎中交好深至二紀已餘睽別
數年二子長逝奉使嶺表途次南康弔孫氏之
孤於其家覩文或手書於僧室慷慨悲歎留題
此詩

孫家虛座弔諸孤張叟僧房見手書二紀歡游今若此
滿衣零淚欲何如腰間金印從如斗鏡裏霜華已滿梳
珍重遠公應笑我塵心唯此未能除

朱處士相與有山水之願見送至南康作此以別之

憐君送我至南康更憶梅花庾嶺芳多少仙山共遊在願君百歲尚康強

清明日清遠峽作

嶺外春過半途中心火又新殷勤清遠峽留戀北歸人迴至南康題紫極宮裏道士房

王事信靡盬飲冰安足辭胡為擁征傳乃至天南陲天

南非我鄉留滯忽踰時還經羽人家豁若雲霧披何以
寬吾懷老莊有微詞達士無不可至人豈偏為客愁勿
復道為君吟此詩

和歙州陳使君見寄

新安風景好時令肅轅門身貴心彌下功多口不言韜
鈴家法在儒雅素風存簪履陪游盛鄉閭俗化敦臨窻
山色秀繞郭水聲喧織絡文章麗矜嚴道義尊樓臺秋
月靜京庾晚雲屯曉吹傳衙鼓晴陽展信旂一篇貽友

好千里倍心論未見歸驂動空能役夢魂

和賈員外戲見贈玉藥花栽

瓊瑤一簇帶花來便劖蒼苔手自栽喜見唐昌舊顏色
為君判病酌金罍

光穆皇后挽歌三首

仙馭期難改坤儀道自光閼宮新表德沙麓舊膺祥素
帟堯門掩凝笳畢陌長東風慘陵樹無復見親桑

永樂留虛位長陵啓夕扉返虞嚴吉仗復土掩空衣功

業投三母光靈極四妃唯應彤史在不與露花晞
隱隱閭門路煙雲曉更愁空瞻金輅出非是濯龍游德
感人倫正風行內職脩還隨偶物化同此思軒丘

嚴相公宅牡丹

但是豪家重牡丹爭如丞相閣前看鳳樓日暖開偏早
雞樹陰濃謝更難數朶已應迷國艷一枝何幸上塵冠
不知更許憑欄否爛熳春光未肯殘

侍宴賦得歸鴈

夜靜羣動息翩翩一鴈歸清音天際遠寒影月中微何處雲同宿長空雪共飛陽和常借便免與素心違

又賦早春書事

苑裏芳華早皇家勝事多弓聲達春氣奕思養天和煖酒紅爐火浮舟綠水波雪晴農事起擊壤聽賡歌

依韻和令公大王薔薇詩

綠樹成陰後羣芳稍歇時誰將新濯錦挂向最長枝卷箔香先入凭欄影任移賞頻嫌酒渴吟苦怕霜髭架迴

籠雲幄庭虛展繡帷有時縈舞袖無力罨遊絲嫩藥鶯
偷采柔條柳伴垂荀池波自照梁苑客嘗窺玉李尋皆
謝金桃亦暗衰花中應獨貴庭下故開遲委艷妝苔砌
分華借槿籬低昂勻灼爍濃淡疊參差幸植王宮裏仍
逢宰府知芳心向誰許醉態不能支芍藥天教避玫瑰
衆共嗤光明烘晝景潤膩裛輕霽麗似期神女珍如重
衛姬君王偏屬詠七子盡搜奇

和門下殷侍郎新茶二十韻

暖吹入春園新芽競粲然才教鷹觜拆未放雪花妍荷

杖青林下攜筐旭景前

採茶須在日未出前

孕靈資雨露鍾秀自山

川碾後香彌遠烹來色更鮮名隨土地貴味逐水泉遷

力藉流黃暖形模紫筍圓

茶之美者有圓捲紫筍

正當鑕柳火遙想

湧金泉

陽羨茶山有金沙泉脩貢時出

任道時新物須依古法煎輕甌浮綠

乳孤竈散餘煙甘薺非予匹宮槐讓我先

槐芽亦可為茶

竹孤空

冉冉荷弱謾田田解渴消殘酒清神感夜眠十漿何足

饋百榼盡堪捐采擷唯憂晚營求不計錢任公因焙顯

陸氏有經傳愛甚真成癖嘗多合得仙亭臺虛靜處風
月艷陽天自可臨泉石何妨雜管弦東山似蒙頂願得
從諸賢

春雪應制

繁陰連曙景瑞雪灑芳辰勢密猶疑臘風和始覺春
林開玉蘂飄座裊香塵欲識宸心悅雲謠慰兆人

進雪詩

欲使新正識有年故飄輕絮伴春還近看瓊樹籠銀闕

遠想瑤池帶玉關
潤逐麤力該切麤鋪綠野暖隨杯酒上朱
顏
朝來花萼樓中宴
數曲賡歌雅頌間

自題山亭三首

簪組非無累
園林未是歸
世喧長不到
何必故山薇
小舫行乘月
高齋卧看山
退公聊自足
爭敢望長閑
跂石仍臨水
披襟復挂冠
機心忘未得
碁局與魚竿

和陳表用員外求酒

暑天頻雨亦頻晴
簾外閑雲重復輕
珍重一壺酬絕唱

向風遙想醉吟聲

奉和右省僕射西亭高卧作

院靜蒼苔積庭幽怪石欹
蟬聲當檻急虹影向簷垂
晝漏猶憐永叢蘭未覺衰
疎篁巢翡翠折葦覆鸕鷀
對酒襟懷曠圍碁旨趣遲
景皆隨所尚物各遂其宜
道與時相會才非世所羈
賦詩貽座客秋事爾何悲

憶新淦觴池寄孟賓于員外

往年淦水駐行軒
引得清流似月圓
自有谿光還碧甃

不勞人力通金船
潤滋苔蘚欺茵席
聲入杉松當管弦
珍重詩人頻管領
莫教塵土咽潺潺

右省僕射後湖亭閑宴鉉以宿直先歸賦詩留獻

湖上一陽生
虛亭啟高宴
楓林煙際出
白鳥波心見
主人忘貴達
座客容疵賤
獨慚殘照催
歸宿明光殿

御定全唐詩卷七百五十五

欽定四庫全書

御定全唐詩卷七百五十六

徐鉉

送孟賓于員外還新淦

暫來城闕不從容，却佩銀魚隱玉峰。
雙澗水邊歌醉石，九仙臺下聽風松。
題詩翠壁稱逋客，采藥春畦狎老農。
野鶴乘軒雲出岫，不知何日再相逢。

孟君別後相續寄書作此酬之

多病怯煩暑短才憂近職跂足北窓風遙懷浩無極故人易成別詩句空相憶尺素寄天涯淦江秋水色

納后夕侍宴

天上軒星正雲間湛露垂禮容過渭水宴喜勝瑤池彩霧籠花燭升龍肅羽儀君臣歡樂日文物盛明時簾捲銀河轉香凝玉漏遲華封傾祝意觴酒與聲詩

又三絕

時平物茂歲功成重翟排雲到玉京四海未知春色至

今宵先入九重城

銀燭金爐禁漏移月輪初照萬年枝造舟已似文王事

卜世應同八百期

漢主承乾帝道光天家花燭宴昭陽六衣盛禮如金屋
彩筆分題似柏梁

北苑侍宴雜詠詩

竹

勁節生宮苑虛心奉豫遊自然名價重不羨渭川侯

松

細韻風中遠寒青雪後濃繁陰堪避雨効用待東封

水

碧草垂低岸東風起細波橫汾從遊宴何謝到天河

風

昨朝纔解凍今日又開花帝力無人識誰知玩物華

菊

細麗披金彩氤氲散遠馨汎杯頻奉賜緣解制頽齡

柳枝詞十首

座中
應制

金馬辭臣賦小詩梨園弟子唱新詞
君恩還似東風意先入靈和蜀柳枝

百草千花共待春綠楊顏色最驚人
天邊雨露年年在上苑芳華歲歲新

長愛龍池二月時毵毵金線弄春姿
假饒葉落枝空後更有梨園笛裏吹

綠水成文柳帶搖東風初到不鳴條
龍舟欲過偏留戀

萬縷輕絲拂御橋

百尺長條婉

一作宛

麴塵詩題不盡畫難真憑君折向人間

種還似君恩處處春

風暖雲開晚照明翠條深映鳳凰城人間欲識靈和態
聽取新詞玉管聲

醉折垂楊唱柳枝金城三月走金羈年年為愛新條好
不覺蒼華也似絲

新春花柳競芳姿偏愛垂楊拂地枝天子偏教詞客賦

宮中要唱洞簫詞

凝碧池頭蘸翠連
鳳凰樓畔簇晴煙
新詞欲詠知難詠
說與雙成入管絃

侍從甘泉與未央
移舟偏要近垂楊
櫻桃未綻梅花老
折得柔條百尺長

奉和宮傳相公懷舊見寄四十韻

謝傳功成德望全
鸞臺初下正蕭然
搏風乍息三千里
感舊重懷四十年
西掖新官同賈馬
南朝興運似開天

文辭職業分工拙流輩班資讓後先每愧陋容勞刻畫
長慙頑石費彫鐫晨趨綸掖吟春永夕會精廬待月圓
立馬有時同草詔聯鑣幾處共成篇閑歌柳葉翻新曲
醉詠桃花促綺筵少壯况逢時世好經過寧慮歲華遷
雲龍得路須騰躍社櫟非材合棄捐再謁湘江猶是幸
兩還宣室竟何緣已知瑕玷勞磨瑩又得官司重接連
聽漏分宵趨建禮從遊同召赴甘泉雲開閭闔分臺殿
風過華林度管弦行止不離宮仗影衣裾嘗惹御爐煙

師資稷契論中禮依止山公典小銓多謝天波垂赤管
敢教晨景過華塼翺飛附驥方經遠巨楫垂風遂濟川
玉燭調時鈞軸正台階平處德星懸巖廊禮絕威容肅
布素情深友好偏長擬營巢安大厦忽驚操鉞領中權
吳門日麗龍銜節京口沙晴鷁畫船蓋代名高方赫赫
戀恩心切更乾乾袁安辭氣忠仍懇吳漢精誠直且專
却許丘明師紀傳更容疏廣奉周旋朱門自得施行馬
厚祿何妨食萬錢密疏尚應勞獻替清談唯見論空玄

東山妓樂供閑步北牖風涼足晏眠玄武湖邊林隱見
五城橋下櫂迴沅曾移苑樹開紅藥新鑿家池種白蓮
不遣前騶妨野逸別尋逋客互招延棊枰寂靜陳虛閣
詩筆沉吟劈彩牋往事偶來春夢裏閑愁因動落花前
青雲舊侶嗟誰在白首親情倍見憐盡日凝思殊悵望
一章追叙信精研韶顏莫與年爭競世慮須憑道節宣
辛喜書生為將相定由陰德致神仙羊公剩有登臨興
尚子都無嫁娶牽退象天山鎮浮競起為霖雨潤原田

從容自保君臣契何必扁舟始是賢

右省僕射相公垂覽和詩復貽長句輒次來韻
西院春歸道思深披衣閑聽暝猿吟鋪陳政事留黃閣
偃息神機在素琴玉柄暫時疎末座瑤華頻復惠清音
開晴便作東山約共賞煙霞放曠心

九日落星山登高

秋暮天高稻穗成落星山上會諸賓黃花汎酒依流俗
白髮滿頭思古人巖影晚看雲出岫湖光遙見客垂綸

風煙不改年長度終待林泉老此身

十日和張少監

重陽高會古平臺吟徧秋光始下來黃菊後期香未減
新詩捧得眼還開每因佳節知身老却憶前歡似夢迴
且喜清時屢行樂是非名利盡悠哉

御筵送鄧王

禁裏秋花光似水清林煙池影共離情暫移黃閣只三
載却望紫垣都數程滿座清風天子送隨車甘雨郡人

迎綺霞閣上詩題在從此還應有頌聲

和張少監晚菊

憶共庭蘭倚砌栽柔條輕吹獨依隈
自知佳節終堪賞為惜流光未忍開
采擷也須盈掌握馨香還解滿尊罍
今朝旬假猶無事更好登臨汎一盃

送馮侍郎

聞君竹馬戲毘陵誰道觀風自六卿
今日聲明光舊物共看旌旆擁書生
斬蛟橋下谿煙碧射虎亭邊草路清

應念筵中倍離恨老來偏重十年兄

又絕句寄題毘陵驛

曾持使節駐毘陵長與州人有舊情為向驛橋風月道
舍人髭鬚白千莖

陳侍郎宅觀花燭

今夜銀河萬里秋人言織女嫁牽牛佩聲寥亮和金奏
燭影熒煌映玉鈎座客亦從天子賜更籌須為主人留
世間盛事君知否朝下鸞臺夕鳳樓

送蕭尚書致仕歸廬陵

江海分飛二十春，重論前事不堪聞。
主憂臣辱誰非我，曲突徙新唯有君。
金紫滿身皆外物，雪霜垂領便離羣。
鶴歸華表望不盡，玉筍山頭多白雲。

賦得秋江晚照

落日照平流，晴空萬里秋。
輕明動楓葉，點的亂沙鷗。
簷網魚梁靜，簷簷稻穗收。
不教行樂倦，冉冉下城樓。

奉和子龍大監與舍弟贈答之什

石渠東觀兩優賢明主知臣豈偶然鴛鴦分行皆接武
金蘭同好共忘年懷恩未遂林泉約竊位空慙組綬懸
多少深情知不盡好音相慰強成篇

史館庭梅見其毫末歷載三十今已半枯嘗僚
諸公唯相公與鉉在耳覩物興感率成短篇謹
書獻上伏惟垂覽

東觀娑娑樹曾憐甲坼時繁英共攀折芳歲幾推移往
事皆陳迹清香亦暗衰相看宜自喜雙鬢合垂絲

太傅相公深感庭梅再成絕唱曲垂借示倍認
知憐謹用舊韻攀和

禁省繁華地含芳自一時雪英開復落紅藥植還移

謂嘗

為翰林又
為史館

靜想分今昔頻吟歎盛衰多情共如此爭免鬢

成絲

太傅相公以庭梅二篇許舍弟同賦再迂藻思
曲有虛稱謹依韻奉和庶申感謝

舊春終無替流光自足悲攀條感花萼和曲許塤篴前

會成春夢何人更已知緣情聊借喻爭敢道言詩

和鍾大監汎舟同游見示

潮溝橫趣北山阿一月三游未是多老去交親難暫捨
閑中滋味更無過谿橋樹映行人渡村徑風飄牧豎歌
孤櫂亂流偏有興滿川晴日弄微波

又和游光睦院

寺門山水際清淺照孱顏客櫂晚維岸僧房猶掩關日
華穿竹靜雲影過堦閑箕踞一長嘯忘懷物我間

和張少監舟中望蔣山

谿路向還背前山高復重
紛披紅葉樹間斷白雲峰
盡日慵移櫂何年醉倚松
自知閒未得不敢笑周顒

茱萸詩

一本作奉御札賦茱萸詩御札云新酒初熟偶與鄭王諸公開當於清宴堂廡之間既覽秋物復矚霜腴因賦茱萸

一題以遣此時之興卿鴻才敏思不可獨醒宜應急徵同賦前旨鉉因進詩云

萬物慶西成茱萸獨擅名
芳排紅結小香透夾衣輕
宿露霑猶重朝陽照更明
長和菊花酒高宴奉西清

奉和御製茱萸

臺畔西風御果新
芳香精彩麗蕭辰
柔條細葉妝治好
紫蒂紅芳點綴勻
幾朶得陪天上宴
千株長作洞中春
今朝聖藻偏流詠
黃菊無由更敢鄰

蒙恩賜酒旨令醉進詩以謝

明光殿裏夜迢迢
多病逢秋自寂寥

臣以病戒酒多時

蠟炬乍傳

丹鳳詔御題初認
白雲謠今宵幸識衢尊味
明日知停入閤朝
為感君恩判一醉
不煩辛苦解金貂

秋日泛舟賦蘋花

素艷擁行舟清香覆碧流遠煙分的的輕浪汎悠悠雨
歇平湖滿風涼運瀆秋今朝流詠處即是白蘋洲

題梁王舊園

梁王舊館枕潮溝共引垂藤繫小舟樹倚危臺風淅淅
草埋欹石雨修修門前不見鄒枚醉池上時聞鴈鴛愁
節士逢秋多感激不須頻向此中游

奉酬度支陳員外

古來賢達士馳騫唯羣書非禮哲言弗習違道無與居儒

家若迂濶遂將世情疎吾友嗣世德古風藹有餘幸遇
漢文皇握蘭佩金魚俯視長沙賦悽悽將焉如

明道人歸西林求題院額作此送之

昔從岐陽狩簪纓滿翠微十年勞我夢今日送師歸曳
尾龜應樂乘軒鶴謾肥含情題小篆將去挂巖扉

送宣州丘判官

憲署游從阻平臺道路賒喜君馳後乘於此會仙槎緩
酌遲飛蓋微吟望綺霞相迎在春渚暫別莫咨嗟

北使還襄邑道中作

九月三十日

九月三十日獨行梁宋道河流激似飛林葉翻如掃程
遙苦晝短野迴知寒早還家亦不閑要且還家了

禁中新月

今夕拜新月沉沉禁署中玉繩疎間彩金掌靜無風節
換知身老時平見歲功吟看北墀暝蘭燼墜微紅

觀吉王從謙花燭

王門嘉禮萬人觀況是新承置醴歡花燭喧闐丞相府

星辰搖動遠遊冠
歌聲暫闋聞宮漏
雲影初開見露盤
帝里佳期頻賦頌
長留故事在金鑾

綦賭賦詩輸劉起居

真

刻燭知無取
爭先素未精
本圖忘物我
何必計輸贏
賭墅終規利
焚囊亦近名
不如相視笑
高詠兩三聲

春盡日游後湖贈劉起居

劉時方
燒藥

今朝湖上送春歸
萬頃澄波照白髭
笑折殘花勸君酒
金丹成熟是何時

送察院李侍御使廬陵因寄孟員外

繡衣乘驛急如星
山水何妨寄野情
肯向九仙臺下歇
閑聽孟叟醉吟聲

後湖訪古各賦一題得西邸

南朝藩閫地八友
舊招尋事往山光
在春晴草色深曲
池魚自樂叢桂鳥
頻吟今日中興運
猶懷翰墨林

送德邁道人之豫章

禪靈橋畔落殘花
橋上離情對日斜
顧我乘軒慙組綬

羨師飛錫指煙霞樓中西嶺真君宅門外南州處士家
莫道空談便無事碧雲詩思更無涯

送陳祕監歸泉州

風滿潮溝木葉飛水邊行客駐驂騑三朝恩澤馮唐老
萬里鄉關賀監歸世路窮通前事遠半生談笑此心違
離歌不識高堂慶特地令人淚滿衣

又聽霓裳羽衣曲送陳君

清商一曲遠人行桃葉津頭月正明此是開元太平曲

莫教偏作別離聲

又題白鷺洲江鷗送陳君

白鷺洲邊江路斜，輕鷗接翼滿平沙。
吾徒來送遠行客，停舟為爾長歎息。
酒旗漁艇兩無猜，月影蘆花鎮相得。
離筵一曲怨復清，滿座銷魂鳥不驚。
人生不及水禽樂，安用虛名上麟閣。
同心攜手今如此，金鼎丹砂何寂寞。
天涯後會眇難期，從此又應添白髭。
願君不忘分飛處，長保翩翩潔白姿。

哭刑部侍郎喬公詩

并序

公臨終數日舍弟徃候之怡然言曰吾徃矣君兄弟可各為一詩哭我翼日復告門生曰吾已得徐君兄弟許我詩餘無事矣其忘懷死生也如此嗚呼絮酒之禮已隔平生挂劒之信永昇穹壤故以

二章為誌

錯詩一章見本集

閱於九原其詩云

舉世重文雅夫君更質真曾嗟混雞鶴終日異淄磷詞賦離騷客封章諫諍臣襟懷道家侶標格古時人逸老

誠云福遺形未免貧求文空得草埋玉遂為塵靜想忘
年契冥思接武晨連宵洽杯酒分日掌絲綸壺簡書陳
事遺孤託世親前賢同此歎非我獨霑巾

御定全唐詩卷七百五十六

欽定四庫全書

御定全唐詩卷七百五十七

徐鉉

徐鉉字楚金廣陵人鉉之弟南唐時為屯田郎中知制誥集賢殿學士集十五卷今存詩五首

送程德琳郎中學士

得遠山

瓜步妖氛滅崐岡草樹青
終朝空望極今日送君行
報政秋雲靜微吟曉月生
樓中長可見特用減離情

太傅相公以東觀庭梅西垣舊植昔陪盛賞今
獨家兄唱和之餘俾令攀和輒依本韻伏愧斐

然

靜對含章樹

漢有含章
簷下樹

閑思共有時香隨荀令在根異

武昌移物性雖搖落人心豈變衰唱詠勝笛曲來往韻

朱絃

太傅相公與家兄梅花詠唱許綴末篇再賜新
詩俯光拙句謹奉清韻用感鈞私伏惟采覽

重歎梅花落非關塞笛悲論文叨接萼末曲愧吹簫

毛詩

云仲氏吹簫

枝逐清風動香因白雪知陶鈞敷左悌更賦邵

公詩

同家兄哭喬侍郎

諸公長者鄭當時事事無心性坦夷但是登臨皆有作
未嘗相見不伸眉生前適意無過酒身後遺言只要詩
三日笑談成理命一篇投弔尚應知

秋詞

井梧紛墮砌寒雁遠橫空雨久莓苔紫霜濃薜荔紅

包穎

包穎南唐時人詩一首

和徐鼎臣見寄

平生中表最情親浮世那堪聚散頻
謝朓却吟歸省閣劉楨猶自卧漳濱
舊游半似前生事要路多逢後進人
且喜新吟報強健明年相望杏園春

鍾謨

鍾謨字仲益其先會稽人徙閩之崇安已而僑居金陵
李璟時為翰林學士進禮部侍郎判尚書省詩三首

貽耀州將

翩翩歸盡塞垣鴻隱隱驚開蟄戶蟲渭北離愁春色裏
江南家事戰塵中還同逐客紉蘭佩誰聽縲囚奏土風
多謝賢侯振吾道免令搔首泣途窮

獻周世宗

三年耀武羣雄服一日回鑾萬國春南北通歡永無事

謝恩歸去老陪臣

代京妓越賓荅徐鉉

一幅輕綃寄海濱
越姑長感昔時恩
欲知別後情多少
點點憑君看淚痕

查文徽

查文徽字光慎歙州休寧人李璟時元宗以取閩功拜
撫州觀察使建州留後詩一首

寄麻姑仙壇道士

別後相思鶴信稀
郡樓南望遠峰迷
人歸仙洞雲連地
花落春林水滿溪
白髮只應悲鏡鑷
丹砂猶待寄刀圭
方平車駕今何在
常苦塵中日易西

馬彥

一作
郁

馬彥少負文藝
季匡威領鎮盧龍
署幕職匡威滅復事
劉仁恭詩一首

贈韓定辭

燧林芳草綿綿思
盡日相攜陟麗譙
別後巖嵒山上望

羨君時復見王喬

韓定辭

韓定辭深州人為鎮州觀察判官檢校尚書祠部郎中
兼侍御史詩一首

荅馬彥

崇霞臺上神仙客學辨癡龍藝最多盛德好將銀管述
麗詞堪與雪兒歌

何昌齡

何昌齡南唐時廬陵宰詩一首

題楊克儉池館

經旬因雨不重來門有蛛絲徑有苔
再向白蓮亭上望不知花木為誰開

李羽

李羽廬州人登南唐進士第詩一首

獻江淮郡守盧公

塞詔東來淝水濱時情惟望秉陶鈞
將軍一陣為功業

忍見沙場百戰人

梁藻

梁藻字仲華長汀人南唐總殿前步軍暉之子性樂蕭散應襲父任不就處士集若干卷今存詩一首

南山池

翡翠戲翻荷葉雨鶯鷺飛破竹林煙時沽村酒臨軒酌
擬摘新茶靠石煎

陳沆

陳沆南唐時廬阜處士詩一首

嘲廬山道士

南唐近事云廬山九天使者廟有一道士體貌魁偉飲啗酒肉晚節

服餌丹砂躁于冲舉有鶴因風所飄憇於廟庭道士驚喜謂當赴昇騰之召令山童控而乘之

羽儀清弱不勝其載毛傷骨折而斃翌日馴養者知訴于公府沆以詩嘲之

啗肉先生欲上昇黃雲踏破紫雲崩龍腰鶴背無多力

傳與麻姑借大鵬

句

罷却兒女戲放他花木生

寒食

掃地雲粘帚耕山鳥怕

牛

閑居

點入旱雲千國仰力浮塵世一毫輕

題水

李詢

李詢南唐時人詩一首

贈織錦人

札札機聲曉復晡眼穿力盡竟何如美人一曲成千賜
心裏猶嫌花樣疎

韓垂

韓垂南唐時人詩一首

題金山

靈山一峰秀巖然殊衆山盤根大江底挿影浮雲間雷
霆常間作風雨時往還象外懸清影千載長躋攀

朱存

朱存金陵人詩一首

後湖

雷轟疊鼓火翻旗三異翩翩試水師驚起黑龍眠不得
狂風猛雨不多時

陳彥

陳彥司門郎中詩一首

和徐舍人九月十一日見寄

衡門寂寂逢迎少不見仙郎向五旬
莫問龍山前日事
菊花開却為閒人

許堅

許堅有異術嘗往來廬阜茅山間
李璟時以異人名不
至後不知所終詩五首

登游齊山

星使南馳入楚重，此山偏得駐行蹤。
落花滿地月華冷，寂寞舊山三四峰。

遊溧陽下山寺

一作靈泉
精舍限韻

地枕吳溪與越峰，前朝恩錫靈泉額。
竹林晴見一作層建雁

塔高石室曾

一作幽

棲幾禪伯荒碑字

一作燕

沒秋

一作蒼

苔

深古池香泛荷花白，客有經年說別林。
落日啼猿情脈

脈

題幽棲觀

仙翁上昇去丹井寄晴壑山色接天台湖光照寥廓玉
洞絕無人老檜猶棲鶴我欲掣青蛇他時冲碧落

上舍人徐鉉

幾宵煙月鎖樓臺欲寄侯門薦下才滿面塵埃人不識
謾隨流水出山來

題茅山觀

常恨清風千載鬱洞天令得恣遊遨松楸古色玉壇靜

鸞鶴不來青漢高茅氏井寒丹已化玄宗碑斷夢仍勞
分明有個長生路休向紅塵嘆二毛

王感化

王感化建州人後入金陵教坊少聰敏未嘗執卷而多
識善為詞滑稽無窮元宗嗣位宴樂擊鞠不輟嘗乘醉
命感化奏水調詞感化唯歌南朝天子愛風流一句如
是者數四元宗悟覆杯歎曰使孫陳二主得此一句不
當有銜璧之辱也由是有寵詩二首

建州節帥更代筵上獻詩

旌旗赴天臺溪山曉色開萬家悲更喜迎佛送如來

奉元宗命咏苑中白野鵲

碧岩深洞恣遊遨天與蘆花作羽毛要識此來棲宿處
上林瓊樹一枝高

句

草中誤認將軍虎山上曾為道士羊

題怪石八句皆用故事今但存其一聯

李家明

李家明廬州西昌人元宗時為樂部頭談諧敏給善為
諷辭詩四首

元宗釣魚無獲進詩

玉甃垂鉤興正濃
碧池春暖水溶溶
凡鱗不敢吞香餌
知是君王合釣龍

咏卧牛

元宗游後苑登臺見牛晚卧美蔭家
明曰臣不學敢上絕句輔相皆慙

曾遭甯戚鞭敲角
又被田單火燎身
閒向斜陽嚼枯草
近來問喘為無人

題紙爲止宋齊丘哭子

烈祖受楊氏禪遷讓皇于海陵元宗繼統用齊

丘之謀無少長殺之齊丘無子晚得一子隨卒慟不止家明曰惟臣能止之乃爲詩書紙爲上乘風吹之度至齊丘家遂絕其縷齊丘見之慚感乃止一作布衣李匡堯作

安排唐祚革強吳盡是先生作計謨一個孩兒擦不得

讓皇百口合何如

一作化家爲國實良圖總是先生畫計謨今日喪離猶自哭讓皇宮眷合

如何

咏皖公山

龍舟輕颭錦帆風正值宸游望遠空回首皖公山色翠

影斜不到壽杯中

湯悅

湯悅陳州西華人本姓殷文圭之子仕南唐官學士歷
樞密使右僕射元宗時淮上用兵書檄教誥皆出其手
詩五首

奉和聖制送鄧王牧宣城

千里陵陽同峽服鑿門昨土寄親賢曙煙已別黃金殿
晚照重登白玉筵江上浮光宜雨後郡中遠岫列窓前

天心待報期年政留與工師播管絃

早春寄華下同志

正是花時節思君寢復興市沽終不醉春夢亦無憑
嶽面懸清雨河心走濁冰東門一條路離恨正相仍

鼎臣學士侍郎以東館庭梅昔翰苑之毫末今
復半枯向時同僚零落都盡素髮垂領茲唯二
人感舊傷懷發於吟詠惠然好我不能無言輒
次來韻攀和

憶見萌芽日還憐合抱時
舊歡如夢想物態暗遷移
素艷今無幾朱顏亦自衰
樹將人共老何暇更悲絲

再次前韻代梅荅

託植經多稔頃筐向盛時
枝條雖已故情分不曾移
莫向堦前老還同鏡裏衰
更應憐墮葉殘吹挂蟲絲

鼎臣學士侍郎楚金舍人學士以再傷庭梅詩
同垂寵和清絕感歎情致俱深因成四十字陳
謝

人物同遷謝重成念舊悲連華得瓊玖合奏發塤篪餘
枿雖無取殘芳尚獲知問君何所似珍重杜欂詩

蕭或

蕭或字文或官少卿詩二首

送鍾員外

賦
月

麗漢金波滿當筵玉笋傾因思頻聚散幾復換虧盈光
徹離襟冷聲符別管清那堪還目此兩地倚樓情

送德林郎中學士赴東府

得菊

離情折楊柳此別異春裁含露東籬艷汎香南浦杯惜
持行次贈留插醉中迴暮齒如能制玉山甘判頽

孫峴

孫峴字文山南康人官郎中詩一首

送鍾員外

賦竹

萬物中蕭灑修篁獨逸羣貞姿曾冒雪高節欲凌雲細
韻風初發濃煙日正曛因題偏惜別不可暫無君

謝仲宣

謝仲宣嘗為齊王景達宮寮詩一首

送鍾員外

松賦

送人多折柳唯我獨吟松若保歲寒在何妨霜雪重森
梢逢靜境廓落見孤峰還似君高節亭亭豈繼蹤

鍾禧

鍾禧字德林東都尹勤政殿學士國亡死節詩一首

別諸同志

鴻得新

隨陽來萬里點點度遙空影落長江水聲悲半夜風殘

秋辭絕漠無定似驚蓬我有離羣恨飄飄類此鴻

喬舜

喬舜字亞元高郵人初為祕書省正字保大中歷中書舍人終刑部侍郎詩一首

送德林郎中學士赴東府

江得

摻袂向江頭朝宗勢未休何人乘桂楫之子過揚州颯颯翹沙鴈漂漂逐浪鷗欲知離別恨半是淚和流

王沂

王沂南唐時人詩一首

送鍾員外

賦風

靜追蘋末興況復值蕭條
猛勢資新鴈寒聲伴暮潮
過山雲散亂經樹葉飄飄
今日煙江上征帆望望遙

陳元裕


陳元裕南唐時人詩一首

送德林郎中學士赴東府

得水

上善湛然秋恩波洽帝猷
謾言生險浪豈與見安流
汎

去星槎遠澄來月練浮滔滔對離酌入洛稱仙舟



御定全唐詩卷七百五十七

欽定四庫全書

集部

御定全唐詩卷七百

五十八至
六十二

詳校官庶吉士臣胡鈺

主事銜臣徐以坤覆勘

總校官知縣臣繆琪

校對官中書臣金光悌

謄錄監生臣黃廷璧

欽定四庫全書

御定全唐詩卷七百五十八

孟貫

孟貫字一之建安人初客江南後仕周詩一卷

宿山寺

溪山盡日行方聽遠鐘聲入院逢僧定登樓見月生
露垂羣木潤泉落一岩清此景關吾事通宵寐不成

贈棲隱洞譚先生

先生雙鬢華深谷卧雲霞不伐有巢樹多移無主花石
泉春釀酒松火夜煎茶因問山中事如君有幾家

歸鴈

春至衡陽鴈思歸塞路長汀洲齊奮翼霄漢共成行雪
盡翻風暖寒收度月涼直應到秋日依舊返瀟湘

春江送人

春江多去情相去枕長汀數鴈別湓浦片帆離洞庭雨
餘莎草綠雲散岸峰青誰共觀明月漁歌夜好聽

過秦嶺

古今傳此嶺高下勢崢嶸
安得青山路化為平地行
蒼苔留虎跡碧樹障溪聲
欲過一回首踟躕無限情

送吳夢閭歸閩

甌閩在天末此去整行衣
久客逢春盡思家冒暑歸
海雲添晚景山瘴減一作減
晴暉相憶吟偏苦不堪書信稀

山中夏日

深山宜避暑門戶映嵐光
夏木蔭溪路晝雲埋石牀
心

源澄道靜衣葛蘤泉涼算得紅塵裏誰知此興長

宿故人江居

渡口樹冥冥南山漸隱青
漁舟歸舊浦鷗鳥宿前汀
靜榻懸燈坐閉門對浪局
相思頻到此幾番醉還醒

寄伍喬

蹉跎春又晚天末信來遲
長憶分攜日正當搖落時
獨遊饒旅恨多事失歸期
君看前溪樹山禽巢幾枝

山中訪人不遇

負琴蕪杖藜特地過巖西已見竹軒閉又聞山鳥啼長
松寒倚谷細草暗連溪久立無人事煙霞歸路迷

贈隱者

世路爭名利深山獨結茅安情自得所非道豈相交百
尺松當戶千年鶴在巢知君於此景未欲等閑拋

寄遲上人

聞罷城中講來安頂上禪夜燈明石室清磬出巖泉欲
訪慙多事相思恨隔年終期息塵慮接話虎溪邊

江邊閑步

閑來南渡口，迤邐看江楓。
一路波濤畔，數家蘆葦中。
遠汀排晚樹，深浦漾寒鴻。
吟罷慵回首，此情誰與同。

過王

一作林

逸人園林

谷口何時住，煙霞一徑深。
水聲離遠洞，山色出疎林。
雪彩從沾鬢，年光不計心。
自言人少到，猶喜我來尋。

寄李處士

僧話磻溪叟，平生重赤松。
夜堂悲蟋蟀，秋水老芙蓉。
吟

坐倦垂釣閑行多倚筇聞名來已久未得一相逢

夏日寄史處士

掩關苔滿地終日坐騰騰暑氣冷衣葛暮雲催燭燈寂
寥知得趣踈嬾似無能還憶舊遊否何年別杜陵

夏日登瀑頂寺因寄諸知己

曾於塵裏望此景在煙霄巖靜水聲近山深暑氣遙杖
藜青石路煮茗白雲樵寄語為郎者誰能訪寂寥

懷果上人

擁錫南遊去名香幾處焚別來無遠信多恐在深雲好
月曾同步幽香省共聞相思不相見林下葉紛紛

寄故園兄弟

久與鄉關阻風塵損舊衣水思和月泛山憶共僧歸林
想添鄰舍溪應改釣磯弟兄無苦事不用別庭闈

早秋吟眺

新秋初

一作新

雨後獨立對遙山去鳥望中沒好雲吟裏

還長年慙道薄明代取身閑從有西征思園林嬾閉闌

送江為歸嶺南

舊山臨海色歸路到天涯此別各多事重逢是幾時江
行晴望遠嶺宿夜吟遲珍重南方客清風失所思

山中荅友人

偶愛春山住因循值暑時風塵非所願泉石本相宜坐
久松陰轉吟餘蟬韻移自慙疎野甚多失故人期

山齋早秋雨中

深居少往還卷箔早秋間雨灑吟蟬樹雲藏嘯狖山炎

蒸如便退衣葛亦堪閑靜坐得無事酒卮聊暢顏

送人遊南越

孑然南越去替爾畏前程見說路岐嶮不通車馬行瘴
煙迷海色嶺樹帶猿聲獨向山家宿多應鄉思生

酬東溪史處士

咫尺東溪路年來偶訪遲泉聲迷夜雨花片落空枝石
徑逢僧出山牀見鶴移貧齋有琴酒曾許月圓期

秋江送客

秋風楚江上送子話遊遨遠水宿何處孤舟春夜濤浦
雲沈鴈影山月照猿啼莫為飢寒苦便成名利勞

寄山中高逸人

煙霞多放曠吟嘯是尋常猿共摘山果僧鄰住石房躡
雲雙屐冷採藥一一作滿身香我憶相逢夜松潭月色涼

懷友人

浮世況多事飄流每歎君路岐何處去消息幾時聞吟
裏落秋葉望中生暮雲孤懷誰慰我夕鳥自成羣

送人歸別業

別業五湖上春殘去路賒
還尋舊山水重到故人家
門徑掩芳草園林落異花
君知釣磯在猶喜有生涯

冬日登江樓

高樓臨古岼野步一作老晚來登江水
因寒落山雲為雪

凝遠村雖入望危檻不堪憑
親老未歸去鄉愁徒自興

寄張山人

草堂南澗邊有客嘯雲煙
掃葉林風後拾薪山雨前
野

橋通竹徑流水入芝田琴月相親夜更深戀不眠

欽定四庫全書

卷七百五十八

御定全唐詩卷七百五十八

欽定四庫全書

御定全唐詩卷七百五十九

成彥雄

成彥雄字文幹南唐進士梅嶺集五卷今編詩一卷

杜鵑花

杜鵑花與鳥怨艷兩何賒疑是口中血滴成枝上花一
聲寒食夜數朶野僧家謝豹出不出日遲遲又斜

江上楓

江楓自蓊鬱不競松筠力一葉落漁家殘陽帶秋色

夜夜曲

自從君去夜錦幌孤蘭麝敲枕對銀缸秦箏綠窓下

村行

曖曖村煙暮牧童出深塢騎牛不顧人吹笛尋山去

煎茶

岳寺春深睡起時虎跑泉畔思遲遲蜀茶倩箇雲僧碾

自拾枯松三四枝

松

大夫名價古今聞
盤屈孤貞更出羣
將謂嶺頭閑得了
夕陽猶挂數枝雲

新燕

纔離海

一作江

島宿江濱應夢笙
歌作近鄰減省雕梁竝

頭語畫堂中有未歸人

會友不至

王孫還是負佳期
玉馬追遊日漸西
獨上郊原人不見

鷓鴣飛過落花溪

惜花

忘餐為戀滿枝紅
錦障頻移護晚風
客散酒酣歸未得
欄邊獨立月明中

中秋月

王母粧成鏡未收
倚欄人在水精樓
笙歌莫占清光盡
留與溪翁一釣舟

暮春日宴溪亭

寒食尋芳遊不足
溪亭還醉綠楊煙
誰家花落臨流樹
數片殘紅到檻前

曉

列宿回元朝北極
爽神晞露滴樓臺
佳人卷箔臨階砌
笑指庭花昨夜開

夕

臺榭沈沈禁漏初
麝煙紅蠟透蝦鬚
雕籠鸚鵡將棲宿
不許鴟鬟轉轆轤

露

銀河昨夜降醞醑灑遍坤維萬象蘇疑是鮫人曾泣處
滿池荷葉捧真珠

遊紫陽宮

古殿煙霞簇畫屏直疑踪跡到蓬瀛碧桃滿地眠花鹿
深院松窓擣藥聲

除夜

銅龍看却送春來莫惜顛狂酒百杯吟髯就中專擬白

那堪更被二更催

元日

戴星先捧祝堯觴
鏡裏堪驚兩鬢霜
好是燈前偷失笑
屠蘇應不得先嘗

寒夜吟

洞房脉脉寒宵永
燭影香消金鳳冷
鴛兒睡魘喚不醒
滿窓撲落銀蟾影

柳枝辭九首

輕籠小徑近誰家
玉馬追風翠影斜
愛把長條惱公子
惹他頭上海棠花

鵝黃剪出小花鈿
綴上芳枝色轉鮮
飲散無人收拾得
月明階下伴鞦韆

東君愛惜與先春
草澤無人處也新
委囑露華并細雨
莫教遲日惹風塵

句踐初迎西子年
琉璃為簾掃溪煙
至今不改當時色
留與王孫繫酒船

綠楊移傍小亭栽，便擁穠煙撥不開。
誰把金刀為刪掠，放教明月入窓來。

遠接關河高接雲，雨餘洗出半天津。
牡丹不用相輕薄，自有清陰覆得人。

掩映鶯花媚有餘，風流才調比應無。
朝朝奉御臨池上，不羨青松拜大夫。

王孫宴罷曲江池，折取春光伴醉歸。
怪得美人爭鬪乞，要他穠翠染羅衣。

殘照林梢嫋數枝能招醉客上金堤馬驕如練纓如火
瑟瑟陰中步步嘶

句

莎草放茵深護砌海榴噴火巧橫牆
紋鱗引子跳銀

海紫燕呼雛語畫梁

見吟窓
雜錄

御定全唐詩卷七百五十九

欽定四庫全書

御定全唐詩卷七百六十

周庠

周庠唐龍州司倉後事王建累官御史中丞中書侍郎
同平章事王衍嗣位進司徒詩一首

寄禪月大師

昨日塵遊到幾家就中偏省近宣麻
水田鋪座時移畫金地譚空說盡沙
傍竹欲添犀浦石栽松更碾味江茶

有時捻得休公卷倚柱閑吟見落霞

張格

張格字義師河間人仕蜀為翰林學士拜中書侍郎同平章事累加右僕射太傅詩一首

寄禪月大師

龍華咫尺斷來音日夕空馳詠德心禪月字清師號別壽春詩古帝恩深畫成羅漢驚三界書似張顛直萬金莫倚名高忘故舊曉晴閑步一相尋

王錯

王錯字鱸祥仕蜀為翰林學士遷御史中丞歷中書侍郎同平章事詩一首

贈禪月大師

長愛吾師性自然天心白月水中蓮神通力遍恒沙外
詩句名高八米前尋訪不聞朝振錫修行唯說夜安禪
太平時節俱無事莫惜時來話草玄

牛希濟

牛希濟隴西人仕蜀為起居郎累官翰林學士御史中丞後入唐為雍州節度副使詩一首

奉詔賦蜀主降唐

滿城文武欲朝天不覺鄰師犯塞煙
唐主再懸新日月蜀王難保舊山川
非干將相扶持拙自是君臣數盡年
古往今來亦如此幾曾歡笑幾潸然

馮涓

馮涓字信之東陽人或曰信都人舉進士登大中四年

宏詞科為京兆府叅軍尋隱商山昭宗起為祠部郎中
擢眉州刺史田陳拒命不令之任涓於成都墨池灌園
自給王建據蜀以為翰林學士終御史大夫集十三卷
今存詩二首

蜀馱引

昂藏大步蠶叢國曲頸微伸高九尺卓女窺窓莫我知
嚴仙據案何曾識

自古皆傳蜀道難爾何能過拔蛇山忽驚登得雞翁磧

又恐礙著鹿頭關

句

不隨俗物皆成土只待良時却補天

題支機石
見紀事

釜魚

化作池中物木履浮為天際船

苦雨

李浩弼

李浩弼蜀翰林學士詩一首

從幸秦川賦驚獸詩

巖下年年自寢訛生靈餐盡意如何
爪牙衆後民隨減

溪壑深來骨已多天子紀綱猶被弄客人窮獨固難過
長途莫怪無人跡盡被山王稜殺他

楊玠

楊玠字靖夫虞卿之曾孫也蜀王建時累官禮部尚書
衍嗣位謫榮經尉乾德中復為太常少卿後歸唐授工
部尚書詩三首

批子弟理舊居狀

談苑云玠自蜀歸唐長安舊居多為鄰里侵占子弟欲詣

府訴其事以狀白玠玠批紙尾云云子弟不復敢言

四鄰侵我我從伊畢竟須思未有時試上含元殿基望
秋風秋草正離離

登慈恩寺塔

紫雲樓下曲江平鴉噪殘陽麥隴青莫上慈恩最高處
不堪看又不堪聽

遣歌妓

垂老無端用意乖誰知道侶厭清齋如今又采蘼蕪去
辜負張君繡鞞鞋

韓昭

韓昭字德華長安人為蜀後主王衍狎客累官禮部尚書文思殿大學士唐兵入蜀王宗弼殺之詩二首

和題劒門

閉關防老寇孰敢振威稜險固疑天設山河自古憑二川奚所賴雙劒最堪矜鳥道微通處煙霞鎖百層

從幸秦川過白衛獻詩

吾王巡狩為安邊此去秦亭尚數千夜照路岐山店火

曉通消息戍瓶煙為雲巫峽雖神女跨鳳秦樓是謫仙
八駿似龍人似虎何愁飛過大漫天

楊鼎夫

楊鼎夫成都人舉進士為蜀安思謙幕吏判權鹽院事
詩一首

記皂江墮水事

鼎夫遊青城山過皂江至中流遇暴風船抵巨石覆洪濤間同

濟盡沒獨鼎夫似有物扶助達岸有老人以杖接引鼎夫未及致謝旋失所之因作詩以記

青城山峭皂江寒欲度當時作等閒
擢逆狂風趨近岸

舟逢怪石碎前灣手攜弱杖倉皇處命出洪濤頃刻間
今日深恩無以報令人羞記崔銜環

蔣貽恭

蔣貽恭江淮人唐末入蜀孟氏時官大井縣令詩二首

題張道隱太山祠畫龍

世人空解競丹青惟子通玄得墨靈應有鬼神看下筆
豈無風雨助成形威疑噴浪歸滄海勢欲擎雲上杳冥
靜閉綠堂深夜後曉來簾幕似聞腥

詠蠶

辛勤得繭不盈筐
燈下繅絲恨更長
著處不知來處苦
但貪衣上繡鴛鴦

李珣

李珣字德潤梓州人有瓊瑤集今存詩三首

漁父歌三首

水接衡門十里餘
信船歸去卧看書
輕爵祿慕玄虛莫
道漁人只爲魚

避世垂綸不記年
官高爭得似君閒
傾白酒對青山笑
指柴閒待月還

掉警鷗飛水濺袍
影侵潭面柳垂條
終日醉絕塵勞曾
見錢塘八月濤

顧夔

顧夔蜀王建時給事
內庭擢茂州刺史
後復事孟知祥
官至太尉詩一首

感禿鶯潛吟

昔日曾看瑞應圖萬般祥瑞不如無摩訶池上分明見
仔細看來是那鵲

張令問

張令問唐興人隱居不仕號天國山人詩一首

與杜光庭

試問朝中為宰相何如林下作神仙一壺美酒一爐藥
飽聽松風白晝眠

御定全唐詩卷七百六十

欽定四庫全書

御定全唐詩卷七百六十一

徐光溥

一作
浦

徐光溥蜀人事孟知祥為觀察判官知祥稱尊號進翰林學士後主景時拜中書侍郎同平章事詩二首

題黃筌秋山圖

第十七句
缺一字

天與黃筌藝奇絕筆精迴感重瞳悅運思潛通造化工
揮毫定得神仙訣秋來奉詔寫秋山寫在輕綃數幅間

高低向背無遺勢，重巒疊嶂何孱顏。目想心存妙尤極，
研巧覈能狀不得。珍禽異獸皆自馴，竒花怪木非因植。
崎嶇石磴絕遊蹤，薄霧冥冥藏半峰。娑羅掩映迷仙洞，
薜荔纍纍垂繳古。松月檻參橋闕，僧老坐揩筇。屈原江上
嬋娟竹，陶潛籬下芳菲菊。良宵祇恐鷓鴣啼，晴波但見
鴛鴦浴。暮煙暮暮鏤村塢，一葉扁舟橫野渡。颯颯白蘋
欲起風，黯黯紅蕉猶帶雨。曲沼芙蓉香馥郁，長汀蘆荻
花蘂。荻雁過孤峰，帖遠青鹿傍小溪。飲殘綠秋山秀兮

秋江靜江光山色相輝映雪迸飛泉濺釣磯雲分落葉
擁樵徑張璪松石徒稱奇邊鸞花鳥何足窺白旻鷹逞
凌風勢薛稷鶴誇警露姿方原畫山空巉巖峭壁枯槎
人見嫌孫位畫水多洶湧驚湍怒濤人見恐若教對此
定妍媸必定伏膺懷愧悚再三展向冕旒側便是移山
回礪力大李小李滅聲華獻之愷之無顏色髣髴垂綸
渭水濱吾皇覩之思良臣依稀荷鍤傳巖野吾皇覩之
求賢者從茲仄展復懸旌宵衣旰食安天下才當老人

星應候願與南山俱獻壽微臣稽首貢長歌丹青景化
同天和

同劉侍郎詠筍

迸出班犀數十株更添幽景向蓬壺出來似有凌雲勢
用作丹梯得也無

歐陽炯

一作迴

歐陽炯益州華陽人少事王衍為中書舍人孟昶時拜
翰林學士歷門下侍郎平章事後從昶歸宋詩六首

貫休應夢羅漢畫歌

一作禪月
大師歌

西嶽高僧名貫休，孤情峭拔凌清秋。
天教水墨畫羅漢，魁岸古容生筆頭。
時捎大絹泥高壁，閉目焚香坐禪室。
忽然夢裏見真儀，脫下一作袈裟點神筆。
高握一作握節

腕當空擲，窻窻毫端任狂逸。
逡巡便是兩三軀，不似畫工虛費日。
怪石安拂嵌復枯，真僧列坐連跣趺。
形如瘦鶴精神健，頂似伏犀頭骨麤。
倚松根傍巖縫，曲錄腰身長欲動。
看經弟子擬聞聲，瞋睡山童疑有夢。
不知夏臘

幾多年一手搯頤偏袒肩口開或若共人語身定復疑
初坐禪案前臥象低垂鼻崖畔戲猿斜展臂芭蕉花裏
刷輕紅苔蘚文中暈深翠硬筇杖矮松床雪色眉毛一
寸長繩開梵夾兩三片線補衲衣千萬行林間亂葉紛
紛墮一印殘香斷煙火皮穿木屐不曾拖筭織蒲團鎮
長坐休公休公逸藝無人加一作聲譽喧喧遍海涯五
七字句一千首大小篆書三十家唐朝歷歷多名士蕭
子雲兼吳道子若將書畫比休公只恐當時浪生死休

公休公始自江南來入秦於今到蜀無交親詩名畫手

皆奇絕觀你凡人爭是人

一作事
事精

瓦棺寺裏維摩詰舍

衛城中辟支佛若將此畫比量看總在人間為第一

題景煥畫應天寺壁天王歌

錦城東北黃金地故跡何人興此寺白眉長老重名公
曾識會稽山處士寺門左壁圖天王威儀部從來何方
鬼神怪異滿壁走當簷颯颯生秋光我聞天王分理四
天下水晶宮殿琉璃瓦綵仗時驅狒狒裝金鞭頻策騏

麟馬毗沙大像何光輝手擎巨塔凌雲飛地神對出寶
餅子天女倒披金縷衣唐朝說著名公畫周昉毫端善
圖寫張僧繇是有神人吳道子稱無敵者奇哉妙手傳
孫公能如此地留神蹤斜窺小鬼怒雙目直倚越狼高
半宵寶冠動總生威容趨蹌左右來傾恭臂橫鷹爪尖
纖利腰纏虎皮斑剝紅飄飄但恐入雲中步驟還疑歸
海東蟒蛇拖得渾身墮精魅搦來雙眼空當時此藝實
難有鎮在寶坊稱不朽東邊畫了空西邊留與後人教

敵手後人見者皆心驚盡為名公不敢爭誰知未滿三十載或有異人來間生匡山處士名稱樸頭骨高竒連五嶽曾持象簡累為官又有蛇珠常在握昔年長老遇竒蹤今日門師識景公興來便請泥高壁亂搶筆頭如疾風逡巡隊伍何顛逸散漫竒形皆湧出交加器械滿虛空兩面或然如闔敵聖王怒色覽東西劒办一揮皆整齊腕頭獅子咬金甲脚底夜叉擊絡鞢馬頭壯健多筋節烏觜彎環如屈鐵遍身虵虺亂縱橫遶額鬪髀乾

了裂眉龐眼豎髮如錐怪異令人不可知科頭巨卒欲
生鬼半面女郎安小兒况聞此寺初興置地脉沈沈當
正氣如何請得二山人下筆咸成千古事君不見明皇
天寶年畫龍致雨非偶然包含萬象藏心裏變現百般
生眼前後來畫品列名賢唯此二人堪比肩人間是物
皆求得此樣欲於何處傳嘗憂壁底生雲霧揭起寺門
天上去

漁父歌二首

擺脫塵機上釣船免教榮辱有流年無繫絆沒愁煎湏
信船中有散仙

風浩寒溪照膽明小君山上玉蟾生荷露墜翠煙輕撥

刺遊魚幾處

一作驚個

大遊仙詩

一作歐陽炳

赤城霞起武陵春桐柏先生解守真白石橋高曾縱步
朱陽館靜每存神囊中隱訣多仙術肘後方書濟俗人
自領蓬萊都水監只憂滄海變成塵

楊柳枝

軟碧搖煙似送人
映花時把翠蛾嚬
青青自是風流主
慢颯金絲待洛神

句

古人重到今人愛
萬局都無一局同

賦棋見
韻語陽秋

劉義度

劉義度後蜀工部侍郎詩一首

感懷詩

昨日方髻髻如今滿頷髻紫閣無心戀青山有意潛

劉義叟

劉義叟後蜀翰林學士詩一首

同徐學士詠笋

徐徐出土非人種枝葉難投日月壺為是因緣生此地
從他長養譬如無

詹敦仁

詹敦仁字君澤固始人初隱仙遊後為清溪令詩六首

復留侯從効問南漢劉巖改名龔字音義

伏羲初畫卦蒼氏乃製字點畫有偏旁陰陽貴協比古者不嫌名周公始稱諱始諱猶未酷後習轉多忌或援他代易或變文迴避濫觴久滋蔓傷心日益熾孫休命子名吳國尊王意靈商靈異僻並曷寂類異梁復踵已非時亦迹舊事翫杰自其一蜀闖是其二鄙我化啓名陋矣裁端義大唐有天下武后擁神器私制迄無取古音實相類垂慮囹圄星虜患厓而塞正圉及壘虜作史

難詳備唐祚值傾危劉龔懷僭偽吁嗟毒蛟輩睥睨飛
龍位龔巖雖同音形體殊乖致廢學愧未弘來問辱不
棄竒字難雄博摛文伏韓智因誦鄙所聞敢布諸下吏

柳堤詩

并序 序
內缺一字

夫柳之性斷根插地遂有生意越一二年而籠晴
蔽陰矣予不知天地生物之心且得以為負耒息
耕之便焉況是木刪之則枝葉倍長剪之則芽蘗
滋多又得以供火爨之用焉時方春也綠染方勻

柔絲裊風攪詩腸之百結宜吾一詠而一觴也春
云暮矣雪絮飛毬悠揚遠近嘆人生之聚散宜閒
居而自適也於是秉耒就耕書橫牛角鋤且帶經
或偃息乎繁陰之下開卷自得悠然而樂雖盛夏
溽暑白扇可置風闕是快則是柳之繁茂不謂無
庇物之効也俄而涼颼颼至一葉驚秋露滴疎枝
月篩淡影放出千巖霽色靜籠數頃黃雲覺歲月
以驚心嘆年華之暗度雨雪飄飄未春而絮青山

改色覺老其容既當收斂暇餘廼且呼童削其繁
冗伐其朽蠹夫插柳之効予既兩資其利泚筆綴
字以示後人使知予插柳之意不為徒耳仍記之
以詩曰

種稻三十頃種柳百餘株稻可供飢粥柳可爨庖廚息
耒柳陰下讀書稻田隅以樂堯舜道同是耕莘夫

勸王氏入貢寵予以官作辭命篇

爭霸圖王事總非中原失統可傷悲往來賓主如郵傳

勝負干戈似局棋周粟縱榮寧忍食葛盧頻顧謾勞思
江山有待早歸去好向鷓鴣林擇一枝

余遷泉山城留侯招遊郡圃作此

當年巧匠製茅亭臺館翬飛匝郡城萬竈貔貅戈甲散
千家羅綺管弦鳴柳腰舞罷香風度花臉粧勻酒暈生
試問亭前花與柳幾番衰謝幾番榮

留侯受南唐節度使知郡事辟予為屬以詩謝
之

晉江江畔趁春風耕破雲山幾萬重雨足一犁無外事
使君何啻五侯封

遣子訪劉乙

掃石耕山舊子真布衣草履自隨身石崖壁立題詩處
知是當年鳳閣人

詹琲

詹琲敦仁子勸陳洪進納土歸隱鳳山詩三首

永嘉亂衣冠南渡流落南泉作憶昔吟

憶昔永嘉際中原板蕩年衣冠墜塗炭輿輅染腥膻國
勢多危厄宗人苦播遷南來頻灑淚渴驥每思泉

癸卯閩亂從弟監察御史敬凝迎仕別作

一別幾經春棲遲晉水濱鵲鷁長在念鴻雁忽來賓五
斗嫌腰折朋山刺眼新善辭如復我四海五湖身

追和秦隱君辭薦之韻上陳侯乞歸鳳山

第八
句缺

一
字

誰言悅口是甘肥獨酌鵝兒嗽翠微蠅利薄於青紙扇

羊裘煖甚紫羅衣心隨倦鳥甘棲宿目送征鴻遠奮飛
擊壤太平朝野客鳳山深處闕生輝

幸黃遜

幸黃遜夔州雲安監人

一云成都人

仕後蜀為翰林學士工

部侍郎隨昶入宋詩一首

雲

因登巨石知來處勃勃元生綠蘚痕靜即等閒藏草木
動時頃刻遍乾坤橫天未必朋元惡捧日還曾瑞至尊

不獨朝朝在巫峽楚王何事謾勞魂

句

苦教作鎮居中國爭得泥金在泰山

岷山見吟窓雜錄

纔聞

暖律先偷眼既待和風始展眉

柳

蒙君知重惠瓊實

薄起金刀釘玉深

嚼處春冰敲齒冷嚙時雪液沃心

寒

梨以上見事文類聚

深粧玉瓦平無壠亂拂蘆花細有聲

雪

日回禽影穿疎木風遞猿聲入小樓

丁元和

丁元和後蜀時人詩一首

詩

九重天子人中貴五等諸侯閭外尊
爭似布衣雲水客不將名字挂乾坤

張立

一作
玄

張立新津人李昊嘗薦之孟昶不赴
自號皐江漁翁詩二首

詠蜀都城上芙蓉花

四十里城花發時錦囊高下照坤維雖粧蜀國三秋色
難入幽風七月詩

又詠

去年今日到成都城上芙蓉錦繡舒今日重來舊遊處
此花顚顚不如初

句

朝廷不用憂巴蜀稱霸何曾是蜀人

初唐明宗徙蜀
豪傑入洛賦

御定全唐詩卷七百六十一